



PROJEKAT PODRŠKE GRAĐANIMA U BORBI PROTIV KORUPCIJE

NEWSLETTER ZA III KVARTAL 2021.



USAID
OD AMERIČKOG NARODA



CENTRI CIVILNIH INICIJATIVA
CENTRI GRADJANSKIH INICIJATIVA



Opis projekta

Projekat „Podrška građanima u borbi protiv korupcije (ACFC)“ provode Centri civilnih inicijativa (CCI), kao glavni implementator, te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID). Projekat se implementira u periodu septembar 2019 – septembar 2024. godine.

Cilj projekta ACFC je povećati učešće građana u borbi protiv korupcije, te su sve projektne aktivnosti dizajnirane i osmišljene na način da potiču snažan i održiv antikorupcijski aktivizam u cijeloj zemlji i na svim nivoima. Projekat ACFC ima za svrhu da civilno društvo bude reprezentativno i kredibilno u borbi protiv korupcije.

U okviru projekta realizuju se sljedeće aktivnosti:

- Monitoring i zagovaranje antikorupcijskih legislativa u sljedećim oblastima: sukob interesa, zaštita zviždača, javne nabavke i zloupotreba javnih sredstava u izbornim kampanjama;
- Uključivanje građana i izgradnja kulture koja odbacuje korupciju
- Koordinacija i izgradnja kapaciteta uključenih organizacija



Korupcija nije problem pojedinca!!!

Grupa ste građana koja se suočava sa korupcijom u vašoj zajednici i zbog toga ne možete da ostvarite pravo koje pripada vama ili širem krugu ljudi?

Trpite posljedice loših odluka donesenih uslijed zloupotrebe položaja ovlaštenih lica ili nezakonitog postupanja vlasti?

Kontaktirajte nas u cilju dobijanja podrške vašim inicijativama u borbi protiv korupcije

063 396 536
protivkorupcije@ccibh.org



Antikoruptivni aktivizam širom Bosne i Hercegovine



- Banja Luka**
 - UG "Restart Srpska"
 - Unija udruženja poslodavaca Republike Srpske"
 - Udruženje „Misli dobro“
 - UG "Put pravde"
 - NGG "Protiv kamenoloma Planina u naselju Karanovac"
- Bijeljina**
 - Helsinski odbor za ljudska prava
- Brčko**
 - NGG "Za transparentno finansiranje neprofitnih organizacija iz budžeta Brčko distrikta"
 - Omladinski centar Vermont
 - UG „Demos“
- Doboj**
 - NGG "Za legalnu eksploataciju minerala iz korita rijeke Bosne"
 - NGG "Licencirane i akreditovane visokoškolske ustanove - validne i priznate diplome"
 - NGG „Uklonite Heksan iz Kotorskog“,
 - Centar za humanu politiku
 - UG "Tolerancijom protiv različitosti (ToPeeR)"
- Drvar**
 - NGG "Drvar bez nelegalnog otpada"
- Foča**
 - NGG Sačuvajmo rijeke Foče
- Goražde**
 - NGG "Spasimo Drinu"
- Istočno Sarajevo**
 - NGG "Stop izgradnji mHE na Kasindolskoj rijeci"
- Jablanica**
 - "Ženski interaktivni ruralni centar" (ŽIR)
- Konjic**
 - NGG "Neretvica - Pusti me da tećem"
- Kreševo**
 - NGG "Kreševski građanski pokret"
- Livno**
 - UG "Centar za građansku saradnju" CGS Livno
- Maglaj**
 - NGG „Za legalnu eksploataciju minerala u gornjem toku rijeke Bosne“,
- Mostar**
 - NGG "Jer nas se tiće"
 - NGG Stop izgradnji mHE Buna I i II
 - NGG „Stop nelegalnoj gradnji na Bijelom Brijegu“
 - Udruženje profesionalaca, trenera i službenika za javne nabavke u BiH (UPTIS)
 - NGG „Ne na Buni i u mome Blagaju“
- Prijedor**
 - Udruženje za zaštitu potrošača DON Prijedor
- Sarajevo**
 - NGG "Hastahana park"
 - NGG "Nelegalna gradnja u opštini Stari Grad"
 - NGG "Inicijativa KCUS"
 - Udruženje „Ja BIH u EU“
 - Udruženje poslodavaca u Federaciji BiH
- Šipovo**
 - NGG "Farmeri"
- Trebinje**
 - UG "Stop mobbing"
- Trnovo**
 - NGG "Stop nelegalnom odlaganju otpada na Krupačkim stijenama"
- Tuzla**
 - UG "Izgled prirode"
- Višegrad:**
 - NGG "Odbranimo rijeke Višegrada"
- Vitez**
 - NGG "Hrabre žene Kruščice"
 - NGG "Naše zgrade - naše pravo da znamo"
- Zenica**
 - NGG "Za namjensko i transparentno trošenje sredstava Fonda za zaštitu okoliša FBiH"
- Zvornik**
 - NGG „STOP nelegalnim šljunkarama na rijeci Drini“
- Žepče**
 - NGG „Sprječimo nelegalnu eksploataciju šljunka na području Žepča i Zavidovića“



Kontaktirajte ih putem njihovih FB stranica!

Više na portalu antikorupcija.info

POKRENUT PROCES KAŽNJAVANJA NELEGALNIH ŠLJUNKARA

Neformalne grupe građana „Za legalnu i kontrolisanu eksplotaciju šljunka u slivu rijeke Bosne“ i „Zaustavimo nelegalnu eksplotaciju šljunka na području Zvornika“ su u slivovima rijeka Bosne i Drine sačinile foto i video dokumentaciju devastiranih vodotoka koju su dostavile nadležnima uz prijave zahtijevajući od njih hitnu reakciju.

Građani su podnijeli ukupno dvadeset prijava Okružnom javnom tužilaštvu u Doboju i Bijeljini, Policijskim upravama Doboј i Zvornik, Vodnoj inspekciji Inspektorata RS i JU „Vode Srpske“, ukazavši im na razmjere devastacija i moguće posljedice od nelegalnih radnji šljunkara, od kojih su moguće i nove poplave.



Upornost građana se isplatila te su sve ove aktivnosti rezultirale reakcijama Okružnog javnog tužilaštva Doboј koje je podiglo tri optužnice za slučaj devastacije u Osjećanima kod Doboјa, te je uslijedila i reakcija Policijske uprave Doboј u dva slučaja i Policijske uprave Zvornik u četiri slučaja.

Na inicijativu građana da se izvrši detaljna kontrola rada šljunkara u ova dva sliva uslijedile su opsežne provjere Poljoprivredne inspekcije Inspektorata RS. U dostavljenom izvještaju o izvršenim kontrolama u periodu od maja do jula 2021. godine inspekcija je izdala 66 prekršajnih naloga u slivu rijeke Bosne na područjima Doboј, Modriča, Vukosavlje i Šamac, a u slivu rijeke Drine izdato je ukupno 14 prekršajnih naloga.

Prijave po uočenim sumnjama za nelegalnu eksplotaciju šljunka građani mogu podnijeti na sljedeće kontakte:

Inspektorat RS: 051 334 627;
JU „Vode Srpske“: 055 201 784;
MUP RS: 051 334 347.





Srušen šesti kat nelegalno izgrađenog stambeno-poslovnog prostora na Bijelom Brijegu u Mostaru

Neformalna grupa građana okupljena oko inicijative „Stop nelegalnoj gradnji na Bijelom Brijegu“ vodi borbu protiv vlasti koja je dozvolila bespravnu gradnju u njihovom susjedstvu. Šesterokatni stambeno-poslovni objekat izgrađen mimo svih propisa i gradskih planova „niknuo“ je na mjestu privatnog stambenog objekta (prizemne kuće) na Bijelom Brijegu, koja je sukladno Regulacionom planu mogla pretrpjeti samo manje intervencije. Zahvaljujući upornosti stanara naselja Bijeli Brijeg, Ministarstvo građenja i prostornog uređenja Hercegovačko-neretvanske županije uvažilo je njihovu žalbu i poništilo zaključak Odjela za urbanizam i građenje Grada Mostara kojim ih se odbija uključiti u postupak, te predmet vratilo navedenom Odjelu na ponovni postupak.

Građani su i dalje vodili svoju borbu te su spriječili izdavanje urbanističke suglasnosti za novu zgradu, a ishodovali su i rušenje dodatno izgrađenog šestog kata. Naime, kako cijelo vrijeme aktivno prate događanja oko izgradnje objekta, čim su primjetili da se gradi kat više nego je nelegalno izdatim dozvolama planirano, odmah su to prijavili inspektoru koji je nakon izlaska na teren sporo djelovao pribavljajući investitoru dodatno vrijeme za legalizaciju dodatnog kata. Međutim, građani su pravno djelovali i podigli kaznene prijave protiv inspektora, šefa Službe za građevinske propise i tadašnjeg gradonačelnika. Sve što su poduzimali aktivno su predstavljali i u medijima što je doprinijelo da pritisci urode plodom - odbijen je zahtjev investitora za legalizaciju dodatnog kata i isti je uklonjen.





Pokrenuta vijećnička inicijativa za preispitivanje nelegalne gradnje u priobalnom dijelu rijeke Bune u Blagaju

Neformalna grupa građana iz Blagaja kraj Mostara organizirala se protiv bespravne gradnje stambenih i poslovnih objekata na području priobalnog dijela na lokalitetu Brutak uz rijeku Bunu. Građani nastoje zaustaviti dugogodišnju devastaciju obala rijeke Bune i podvrgnuti sankcijama odgovorne koji su dozvolili gradnju građevinskih objekata u zaštićenom vodnom pojasu.

Grupa je uspjela poništiti urbanističku suglasnost za dva stambena objekat koja se grade uz samu rijeku nakon čega je bilo za očekivati da službe ponište i građevnu dozvolu. Posljednja informacija koju su dobili je da je Odjel za urbanizam i građenje Grada Mostara u trećem mjesecu ove godine donio zaključak o prekidanju ponovnog postupka. Prekid postupka će trajati sve dok sud ne odluči po tužbi u upravnom sporu rješavanja urbanističke saglasnosti za izgradnju stambenog objekta pokrenutoj od strane investitora.

Međutim, građani ne odustaju. Pokrenuli su kaznene prijave protiv odgovornih u gradskim službama, održali sastanke sa predstavnicima svih političkih subjekata koji egzistiraju u Gradskom vijeću Grada Mostara a jedan od vijećnika je postavio pitanje dokle je došao postupak u ovom konkretnom slučaju i pokrenuo inicijativu da se preispita bespravna gradnja na području Blagaja.





ZABRANJENA GRADNJA MINI HIDROELEKTRANA NA NERETVICI!

Služba za prostorno uređenje, građenje i obnovu Općine Konjic odbila je zahtjev JP Elektroprivre BiH d.d. za izdavanje dozvole za izgradnju mHE Gorovnik ušće i mHE Sirijanski most, sa obrazloženjem da investitor u zakonom predviđenom roku nije dostavio – energetsku dozvolu! Služba za prostorno uređenje, građenje i obnovu Općine Konjic je još 2008. godine donijela rješenje kojim se JP Elektroprivredi BiH odobrava gradnja mHE Gorovnik ušće i Sirijanski most, međutim, to je rješenje, u julu ove godine, ukinulo Ministarstvo građenja i prostornog uređenja HNK, a po Zahtjevu Udruženja za zaštitu okoline Zeleni Neretva. Tada je utvrđeno da je Rješenje iz 2018. godine za gradnju mHE Općina donijela bez energetske dozvole/saglasnosti, koja prethodi izdavanju odobrenja za gradnju novih proizvodnih elektroenergetskih objekata. Iako su tokom ljeta poništene građevinske dozvole za obje mHE, Općina Konjic ih je pokušala ostaviti na snazi, čime je ignorisala odluku drugostepenog organa, u ovom slučaju Ministarstva građenja i prostornog uređenja HNK. Budući da je na taj način Općina počinila teško kršenje zakona, Upravna inspekcija HNK je izvršila pritisak da se zakon ispoštuje, te je, kao rezultat, Zahtjev Elektroprivrede za izgradnju mHE na Neretvici konačno odbijen.

Ovo znači veliku pobjedu građana i ekoaktivista okupljenih u Udruženje građana "Pusti me da tećem" koji su do sada u više navrata svojim tijelima branili rijeku Neretvicu.



„Njihovo je da probaju, naše je da ne damo i neće dobiti garantujemo“

Vejsil Hondo, Konjic.



PRVA POBJEDA NGG STOP IZGRADNJI MHE NA KASINDOLSKOJ RIJECI - PONIŠTENE SVE TRI EKOLOŠKE DOZVOLE ZA GRADNJU MHE NA KASINDOLSKOJ RIJECI!

Okružni sud u Banjaluci poništio je ekološke dozvole za tri mini hidroelektrane na Kasindolskoj rijeci. Nakon što su poništene ekološke dozvole za mHE Samar i mHE Slapi, sud je poništio i ekološku dozvolu za mHE Podivič, koja je već izgrađena na Kasindolskoj rijeci.

U svega dva mjeseca, oborene su, dakle, sve tri ekološke dozvole za mini hidroelektrane na Kasindolskoj rijeci, koje je izdalo Ministarstvo prostornog uređenja, građevinarstva i ekologije Republike Srpske. Nekoliko mjeseci građani vode borbu za zaustavljanje izgradnje 3 mini hidroelektrane na Kasindolskoj rijeci zbog nezakonitosti i proceduralnih propusta. Uprkos evidentnom lošem stanju životne sredine na terenu, u septembru prošle godine Ministarstvo za prostorno uređenje, građevinarstvo i ekologiju Republike Srpske ipak je izdalo rješenja kojima se obnavljaju ekološke dozvole za male hidroelektrane "Podivič", "Slapi" i "Samar".

Ovo za građane Istočnog Sarajeva okupljene u neformalnu grupu građana „Stop izgradnji mHE na Kasindolskoj rijeci“ predstavlja veliku pobjedu nad nepravilnostima i nezakonitostima u slučaju izgradnje 3 mHE na Kasindolskoj rijeci, te očekuju od svih nadležnih institucija da sve naredne odluke donose u skladu sa ovom presudom te poštujući zakone i propise.





PONIŠTENA OKOLINSKA DOZVOLA ZA MHE ZLATE NA RIJECI DOLJANKI

Udruženje građana „Za Doljanku“ je nastalo kao odgovor na neodgovorno ponašanje savjeta MZ i vladajućih struktura Općine Jablanica pri izdavanju suglasnosti i dozvola za gradnju mHE Zlate na rijeci Doljanki.

Građani su u više navrata održavali i sastanke sa federalnim institucijama koje su zadužene za izdavanje ključnih dokumenata, a pokrenuta su i dva sudska spora, jedan pred Općinskim sudom u Mostaru protiv građevne dozvole i drugi pred Kantonalnim sudom u Sarajevu protiv okolinske dozvole koju je izdalо Federalno ministarstvo okoliša i turizma.

Kantonalni sud u Sarajevu je donio rješenje o poništenju okolinske dozvole i postupak vratio na početak čime su potvrđene i opravdane sve sumnje o povredama procedura i zakona te nelegalne radnje na koje su upućivali iz Udruženja građana „Za Doljanku“.



Na fotografiji je prikaz aktivnosti sa kampanje:
„Umjetnici za spas rijeke Balkana“.



NAKON PONIŠTENE OKOLINSKE DOZVOLE POKRENUTA INICIJATIVA ZA BRISANJE MHE NA BUNSKIM KANALIMA IZ PROSTORNOG PLANA GRADA MOSTARA

Ekološka udruga „Majski cvijet“ i mještani prigradskog naselja Buna zalažu se već duže vrijeme za zabranu izgradnje mHE Buna I i Buna II na lokaciji Bunskih kanala. Nakon cijelog niza provedenih akcija, organiziranih promotivnih i edukativnih štandova, prikupljenih preko 5000 potpisa građana, iscrpljujuće pravne borbe i medijskih nastupa, okolinska dozvola je poništena i postupak vraćen na početak, ali time borba nije završena. Investitor se izjasnio za obnovu postupka i procedura je u tijeku. Međutim, građani su iskoristili predizborni vrijeme i obratili se svim kandidatima kako bi ih upoznali s problemom, a nakon potvrđivanja novog Gradskog vijeća pokrenuta je i vijećnička inicijativa za brisanje mHE Buna I i Buna II iz novog Prostornog plana Grada Mostara.

Sukladno pokrenutoj inicijativi, Odjel za gospodarske, komunalne i inspekcijske poslove je službeno od Odjela za urbanizam zatražio brisanje iz prostornog plana lokaliteta Buna I i Buna II kao područja izgradnje mHE. Na temelju dokumentacije koju je Udruženje dostavilo, Odjel je utvrdio kako zemljišta planirana za izgradnju mHE na Buni posjeduju svojstvo zaštićenog objekta prirode i da su stavljeni pod zakonsku zaštitu. Osim toga, Odjel je zatražio i brisanje ovih lokaliteta iz novog Prostornog plana koji se planira usvojiti krajem ove godine.



Povučena tužba Grada Mostara, JP Komos, JP Parkovi i JP Deponija protiv Udruženja građana „Jer nas se tiče“

Građanska inicijativa „Jer nas se tiče“ zalaže se za zatvaranje deponije Uborak u Mostaru kojoj su još 4.12.2019. istekle dozvole za rad i na koju se ne smije odlagati otpad. Međutim, vlasti je odbijaju zatvoriti pravdajući se javnim interesom, zbog čega građani iz obližnjih naselja okupljeni oko Udruženja građana „Jer nas se tiče“ organiziraju u više navrata proteste i blokade kako bi iskazali svoje nezadovoljstvo nefunkcioniranjem pravne države. Nakon godinu dana od blokade deponije, kada je intervenirala i policija koja je po zahtjevu Grada Mostara primjenom sile izvršila deblokadu, Udruženju je stigla zajednička tužba Grada Mostara i četiri JP (Komos, Parkovi, Deponija) za nanesenu štetu u iznosu od nepunih 700.000 KM. Nakon provedenih lokalnih izbora i izbora novog gradonačelnika aktivisti su nastavili vršiti dodatni pritisak kako bi se riješio problem ali i ukazivati na besmislenost pokrenute tužbe. U dijalogu sa predstavnicima nove lokalne vlasti susretali su se sa različitim obećanjima, ali i ucjenama tj. uvjetovanjem povlačenja tužbe u slučaju da se Udruženje obveže da neće onemogućiti provedbu Plana prilagodbe postojeće deponije koji bi se provodio više od pet narednih godina. To znači da bi se postojeća lokacija proširila i na nju odlagalo smeće sigurnih još pet i više godina. A u tom periodu bi se trebao riješiti problem daljnog odlaganja otpada. Građani nisu pristali na te ucjene od strane Gradskog vijeća, a osim toga Udruženje nije pristalo na provođenje Plana prilagodbe bez utvrđenih rokova i odluke o zatvaranju postojeće i otvaranju nove lokacije i pokrenulo je tužbu protiv Plana prilagodbe.

Uvidjevši da ucjenama neće postići ništa, a pokušavajući odobrovoljiti Udruženje, gradonačelnik donosi odluku o povlačenju tužbe. Na taj način je Udruženje građana „Jer nas se tiče“ dokazalo besmislenost podizanja tužbe i istinitost tvrdnje da je tužba ustvari bila samo pritisak da se građani obeshrabre i pokleknu u svojoj borbi.

„Ovdje se igraju naša djeca, Uborak je problem svih nas“,
građani Mostara.



Borba neformalne grupe građana „Hastahana park“ urodila plodom!

Načelnik Opštine Centar, Srđan Mandić, je od početka svog angažmana javno isticao da će slušati volju građana i poštovati njihove zahtjeve. S tim u vezi je kreirao ad-hoc, nezavisno, radno tijelo sastavljeno od tri pravnika koji su imali zadatak utvrditi da li je bilo nepravilnosti prilikom izmjena regulacionog plana Marijin Dvor – lokalitet Hastahana koji je kasnije omogućio prodaju jednoj dijelu parka Centralnoj banci.

Ad-hoc komisija je utvrdila niz nepravilnosti, počev od toga da se uopšte nije trebalo i smjelo pristupiti izradi izmjena i dopuna regulacionog plana, zbog Odluke iz 2005. godine koju je donijela Komisija za očuvanje nacionalnih spomenika o proglašenju nacionalnog spomenika Magribija džamija, te, da je u tom pojasu zabranjena bilo kakva gradnja koja bi mogla ugroziti nacionalni spomenik. Dakle, gradnja u dijelu Hastahana parka bi direktno ugrozila nacionalni spomenik koji uživa najviši stepen pravne zaštite. Pored toga, Federalno ministarstvo kulture i sporta je 2017. godine jasno naglasilo da se lokalitet Hastahana nalazi u sklopu gradske ambijentalne cjeline te da se nalazi na listi za proglašenje nacionalnim spomenikom, a svi lokaliteti koji su na listi za proglašenje se tretiraju isto kao i nacionalni spomenici i moraju se štititi. Komisija je ukazala na još niz propusta i kršenja zakona u ovom slučaju, što stavlja sumnju na zakonitost samog procesa izmjena i dopuna regulacionog plana. Nakon ovog izvještaja, opštinski načelnik je podnio krivične prijave protiv lica iz prethodne opštinske administracije zbog svih nepravilnosti prilikom izmjena regulacionog plana te naglasio da se volja građana mora poštovati.

Sve ovo ukazuje da su građani okupljeni oko inicijative Hastahana park bili u pravu kada su tvrdili da zakon i njihova volja nisu ispoštovani i ovakav rasplet situacije smatraju svojim uspjehom!

„Vaše je pravo da nas podržite ili ne podržite, ali mi nećemo odustati od naše borbe za park“,
predstavnici neformalne grupe građana „Hastahana park“



Utvrđena lista akreditovanih visokoškolskih ustanova u BiH

Kako bi razriješili dileme izdavanja diploma od strane neakreditovanih visokoškolskih ustanova neformalna grupa studenata "STOP neakreditovanim fakultetima - Inicijativa neformalne grupe mladih Republike Srpske" obratila se institucijama, kako bi od njih dobili stručno mišljenje i pravno tumačenje i utvrdili listu akreditovanih VŠU u dva entiteta i Brčko distriktu.

Zahvaljujući odgovorima Agencije za visoko obrazovanje i osiguranje kvaliteta BiH, Agencije za akreditaciju RS, Ministarstva za naučno tehnološki razvoj, visoko obrazovanje i informaciono društvo RS, kao i Ministarstva pravde BiH i Ministarstva civilnih poslova BiH, utvrđeno je da se akreditovanim visokoškolskim ustanovama smatraju isključivo one visokoškolske ustanove koje su upisane u Državni registar akreditovanih visokoškolskih ustanova u Bosni i Hercegovini. Time su razriješili višegodišnju dilemu oko tumačenja Okvirnog zakona o visokom obrazovanju i da li su za konkursiranje za rad u javnim ustanovama priznate samo diplome koje izdaju visokoškolske ustanove upisane u registar Agencije za visoko obrazovanje i osiguranje kvaliteta u BiH.

Na osnovu tih podataka utvrđeno je da je 12 VŠU iz RS upisanih u Državni registar akreditovanih visokoškolskih ustanova u BiH, a pet VŠU nemaju akreditaciju, jer nisu upisane u registar HEA BiH, iako se nalaze se u registru Agencije RS. Osim toga u Federaciji BiH je akreditovana 21 VŠU, te je u Brčkom distriktu samo jedna VŠU akreditovana.

DA LI STUDIRAŠ NA AKREDITOVANOM FAKULTETU?

STOP NEAKREDITOVANIM FAKULTETIMA

The map shows the following counts of accredited universities by entity:

- PRIJEDOR: 1
- BANJA LUKA: 7
- DOBOK: 1
- BRČKO: 1
- BIJELJINA: 2
- ISTOČNO SARAJEVO: 1

VISOKOŠKOLSKE USTANOVE IZ RS-A I BRČKO DISTRINKTA UPISANE U REGISTAR AGENCIJE ZA RAZVOJ VISOKOG OBRAZOVANJA I OSIGURANJE KVALITETA BIH

- Panevropski univerzitet Apollon, Banja Luka
- Visoka škola za primjenjene i pravne nauke "Prometej" Banja Luka
- Univerzitet za poslovni inženjerin i menadžment Banja Luka
- Univerzitet u Banjoj Luci
- Univerzitet za poslovne studije Banja Luka
- Visoka škola Banja Luka College
- Nezavisni univerzitet Banja Luka
- Univerzitet u Istočnom Sarajevu
- Visoka poslovno tehnička škola Doboj
- Univerzitet Sinergija, Bijeljina
- Univerzitet "Bijeljina", Bijeljina
- Visoka medicinska škola Prijedor
- Visoka škola računarstva i poslovnih komunikacija eMPIRICA, Brčko

Podržano od:

USAID CCI

*IZVOR PODATAKA: [HTTP://WWW.HEA.GOV.BA/AKREDITACUA_VSU/DEFAULT.ASPX](http://WWW.HEA.GOV.BA/AKREDITACUA_VSU/DEFAULT.ASPX) OD 12.08.2021.



Etažni vlasnici u Općini Vitez konačno imaju mogućnost uvida u trošenje njihovih para

U Općini Vitez etažni vlasnici već godinama nisu imali uvid u stanje njihovih računa od naknada koje uplaćuju svaki mjesec na račun JSP Vitez stan, što su bivši i sadašnji prinudni upravitelj pravdali nedostatkom kadrova i zastarjelim softverom koji nije omogućavao da se u svakom trenutku mogu vidjeti osnovni podaci o uplatama, troškovima, dugovanjima itd. Neki podaci i troškovi su se mogli dobiti isključivo usmeno.

Nakon pritiska od strane neformalne grupe građana "Trebamo da znamo" na direktora JSP Vitez stan omogućeno je da svi zainteresovani etažni vlasnici mogu svakog utorka od 08:00-11:00h dobiti izvještaj o stanju na računu. Ta praksa se poštuje od polovine septembra te sada etažni vlasnici mogu dobiti stanje na računu sa danom podnošenja zahtjeva i to na licu mjesta.

Takođe, kroz svoje djelovanje neformalna grupa građana je pokrenula i druge procese na unaprjeđenju položaja etažnih vlasnika i zaštite njihovih prava. Konkretno, kod realizacije većih investicija, kao što je energetska efikasnost i utopljavanje zgrada, koja je za ovu godinu planirana u iznosu od 80.000 KM, će biti na raspolaganju i vlasnicima zgrada za sufinansiranje velikih popravki (npr. zamjenu dotrajalih krovova). Uvjet za dobivanje ovih sredstava je da etažni vlasnici prikupe što više vlastitih sredstva za ove namjene, a da će općina osigurati dio novca, koji ne bi bio veći od 25% cijene radova.

Ovo je veliki uspjeh neformalne grupe građana „Trebamo da znamo“ s obzirom na to da je dosadašnja praksa bila da se, nakon što prikupe određeni dio sredstava za velike radove, etažni vlasnici obrate načelniku općine koji je odobravao sredstva za sufinansiranje u iznosu od nekoliko hiljada KM. Sredstva su odobravana paušalno, bez kriterija, najčešće iz sredstava rezerve i nisu bila dovoljna za velike popravke, tako da su prikupljena sredstva godinama bila neutrošena, što je izazivalo dodatne sumnje kod etažnih vlasnika.

USPJEŠNE KAMPANJE U BORBI PROTIV KORUPCIJE



KARTON REVOLUCIJA

Uspješnom realizacijom aktivnosti borbe protiv korupcije u Domu zdravlja Tuzla "Karton revolucija" je putem 20 konkretnih akcija u čijoj organizaciji je učestvovalo preko 100 građana i građanki a indirektno i do 500 građana (fotografisanje sa kartonima, ulične akcije, peticija, press konferencija), uspjela u značajnoj mjeri zaustaviti sprovođenje korupcije i nepotizma na odjelu radiologije Doma zdravlja Tuzla inicirajući putem 5 konkretnih inicijativa nabavku novog savremenog mamografa i aktiviranje postojećih mamografa koji u 2020. godini nikako nisu radili.

Na ovaj način je smanjen broj pacijenata koji svoje usluge plaćaju u privatnim ustanovama ali i prikupljeni dokazi i stvoreni preduslovi za krivične sankcije odgovornih u Domu zdravlja putem dostavljanja informacija Tužilaštvu Tuzlanskog kantona koju je dostavio aktivistički pokret i čija analiza je trenutno u toku.

Poseban benefit je činjenica da su građani i građanke direktno ohrabreni za borbu protiv korupcije i nepotizma o čemu govori podatak da su objave na Facebook profilu Karton revolucije dosegle vrijednost od preko 500.000 (pola miliona pregleda) a da je 300 građana direktno popunilo obrazac za učlanjenje u pokret.



Virus za koji ima lijek!

Podrška građanima u borbi protiv korupcije u zdravstvu



Stop mobbing i KAP pokrenuli su kampanju u oba entiteta za donošenje Zakona o pravima, obavezama i odgovornostima pacijenata u RS i provedbu Zakona o pravima, obavezama i odgovornostima pacijenata u FBiH, te je otpočeo proces zagovaranja. Primjena navedenih zakona unaprijediće sistem prevencije od korupcije u zdravstvu, te poboljšati zdravstvenu zaštitu pacijenata, poput prava na dostupnost zdravstvene zaštite, na obaviještenost i učestvovanje u postupku liječenja, na poštovanje pacijentovog vremena, na uvid u medicinsku dokumentaciju, prava na prigovor, prava na nadoknadu štete.

U RS-u je prikupljanje potpisa podrške građana organizovano u avgustu i septembru 2021. g. u Trebinju, Doboju, Banja Luci, Novom Gradu, Prijedoru, Gradišci. Prikupljeno je ukupno 2.600 potpisa građana/ki u RS.

U FBiH je prikupljanje potpisa podrške građana u avgustu i septembru organizovano u Bihaću, Cazinu, Bužimu, tri dana u Sarajevu, Zenici, Tuzli, Mostaru, Gračanici, Kalesiji, Tomislavgradu. Prikupljeno je ukupno 1.800 potpisa za FBiH.





Мисли Добро
ЗА ДОБРО ПРОМИСЛИ ДОБРО

REALNA CIJENA LIJEKOVA

Kroz kampanju NVO Misli dobro pod nazivom "Realna cijena lijekova" kreirana je Analiza o cijenama lijekova u BiH, sa uporednim prikazom prakse u zemljama u regionu i preporukama za smanjenje cijene i unapređenjem sistema prevencije od korupcije. Analiza, kakva do sada nije urađena u BiH, niti u regionu, pokazuje da je regulativa koja uređuje navedenu oblast na svim nivoima (država, entitet, kanton), u isključivom interesu veletrgovaca i maloprodajnih lanaca apoteka. Posljedica toga je da građani BiH, u odnosu na zemlje u regionu, plaćaju ubjedljivo najviše cijene lijekova.

Ono što posebno zabrinjava, jeste činjenica da nadzor nad tržištem vrijednim preko 700 miliona KM u Bosni i Hercegovini praktično ne postoji, što isključivo odgovara veletrgovcima i maloprodajnim lancima apoteka u Bosni i Hercegovini, koji u odnosu na regionalna tržišta, upravo u Bosni i Hercegovini ubiru najviši profit.

Tokom izrade analize, projektni tim NVO Misli dobro radio je sa udruženjima koja okupljaju pacijente na cijeloj teritoriji BiH, a održano je i više sastanaka sa nadležnim institucijama na svim nivoima vlasti. Konkretna saradnja dogovorena je sa četiri Udruženja koja će zajedno sa Udruženjem Misli dobro zagovarati unapređenje regulative koja utiče na tržište lijekova u BiH s ciljem smanjenja cijene i smanjenjem mogućnosti za korupciju u predmetnoj oblasti.

Analiza je dostupna

<https://docs.google.com/document/d/1Jdbzfc2Yx3GrcqLfzsQMsVovaPoLG07LeW5s5NPNd7w/edit>



Zajedno protiv korupcije u porodilištima u Bosni i Hercegovini – suočavanje sa uzrokom do rješenja problema

Udruženje BABY STEPS nastavilo je aktivnosti u okviru kampanje za smanjenje korupcije i poboljšanje kvalitete rada bh.porodilišta uz saradnju građana i svih nivoa vlasti u svrhu smanjenja stope korupcije u bh.porodilištima. Početkom septembra u Sarajevu je održan okrugli sto na temu „Borba protiv korupcije u porodilištima“, kojem su prisustvovali predstavnici Ministarstva zdravstva Kantona Sarajevo, Federalnog ministarstva zdravstva, šef Ureda za borbu protiv korupcije, predstavnici nevladinog sektora, medija i porodilje koje su lično podijelile svoja iskustva. Okrugli sto je pružio priliku za okupljanje svih aktera čija sfera djelovanja je direktno povezana sa problemom od interesa, u cilju iznalaženja najadekvatnijih rješenja i antikoruptivnih mehanizama. Jedan od panelista, šef Ureda za borbu protiv korupcije i upravljanja kvalitetom dr. Erduan Kafedžić, se u svom obraćanju osvrnuo na problem običajnog prava i percepcije javnosti kada je u pitanju porod, koji pored medicinskog aspekta zasigurno predstavlja važan događaj za svaku porodicu, zbog čega se korupcija često opravdava, a pojedinci teško odlučuju na prijavu. Istaknuo je kako će Ured za borbu protiv korupcije raspoloživim sredstvima i mehanizmima podržati pacijente koji odluče prijaviti korupciju u aspektima krivičnog procesuiranja počinilaca i zaštiti identiteta pacijenta.

Nastavljene su aktivnosti direktnog rada sa porodiljama i podizanja svijesti o prisustvu i posljedicama korupcije u porodilištima. U okviru aktivnosti »Podijeli svoje iskustvo« prikupljeno je 150 anonimnih pisanih ličnih iskustava iz porodilišta iz BiH, te je također snimljeno osam video svjedočanstava. Početkom jula je realizovana ulična aktivnost podjeli informativnih letaka i potpisivanje peticije u Centru Safet Zajko u Sarajevu, a krajem septembra je u saradnji sa regionalnom koordinatoricom Brankicom Raković realizovano druženje sa porodiljama u Banjaluci, uz prisustvo medija.





SKENIRAJMO KORUPCIJU

UG DEMOS u sklopu projekta „Skenirajmo korupciju“ je na Trgu mladih, nastavilo da skreće pažnju javnosti na važnost nabave CT uređaja i magnetne rezonance za potrebe brčanskog zdravstva i građana, organizovanjem niza Uličnih akcija.

Proces javne nabavke CT aparata za zdravstvo u Brčko distriktu nakon godina bezuspješnih pokušaja napokon je završen u septembru. Struka kaže da ovaj uređaj ispunjava sve potrebne karakteristike, te je ova lokalna zajednica zaustavila odliv novca, koji se uslijed njegovog nedostatka slivao u privatne kliničke centre. Međutim, ostaje neriješeno pitanje procesa javnih nabavki, jer se sumnja u brojne koruptivne radnje u ovoj oblasti.

Zbog žalbe da je jedan od ponuđača favorizovan u postupku, poništen je tender za javnu nabavku aparata za magnetnu rezonancu, koji je uz CT aparat godinama neophodan brčanskom zdravstvu. Postupak za nabavku tog uređaja trajao je više od tri godine, stoga se sa razlogom sumnja u postojanje koruptivnih radnji.

“Vjerujem da će u nabavci magnetne rezonance taj manevarski prostor ljudi koji na neki način možda razmišljaju u tom smjeru biti što manji”,

izjavio je Damjan Dundžić.



NOVI PRAVILNIK O PODSTICAJIMA U POLJOPRIVREDI U BRČKO DISTRIKTU

Od uspostave Brčko distrikta BiH, Pravilnik o podsticajima u poljoprivredi se mijenja svake godine. Ove godine po prvi put, uz pomoć Omladinskog centra „Vermont“, poljoprivrednici su imali priliku da daju svoje mišljenje na sam Pravilnik te su njihovi ključni zahtjevi usvojeni.

Naime, ranijih godina poljoprivrednici nisu kontaktirani po pitanju iznošenja komentara na pravilnik. OC Vermont je početkom rada na ovoj tematiki, obišao sve poljoprivrednike koji nisu u dovoljnoj mjeri osposobljeni za upotrebu informacionih tehnologija, prikupili komentare i iste sublimirali i dostavili Odjeljenju za poljoprivrodu Vlade Brčko distrikta BiH.

Većina prijedloga je tim putem i uvrštena u novi pravilnik. Najvažniji zahtjevi koji su usvojeni su:

- Da se malim proizvođačima do 20.000 KM iznos podsticaja isplaćuje 100%;
- Uspostavljanje savjetodavne službe u okviru Odjeljenja za poljoprivrodu, šumarstvo i vodoprivredu za dodjelu podsticaja;
- Uvedena dodatna kontrola rada komisije za podsticaje.

Paralelno, vođena je kampanja za podizanje svijesti građana putem društvenih mreža sa ciljem obavještavanja što većeg broja građana o korupciji u ovom području, odnosno korištenju javnih sredstava, te ulične akcije putem kojih smo direktno komunicirali sa građanima.

Djelovanjem NVO sektora uz podršku poljoprivrednika postigao se značajan rezultat i to da se manjim poljoprivrednicima do 20.000 KM podsticaji odmah isplaćuju, također usvojeni Pravilnik se neće više mijenjati kao do sada svake godine osim ako ne bude postojala potreba za to. To znači da će poljoprivrednici podnosići zahtjeve na vrijeme i dobijati novac na vrijeme. 2022. godina će biti probna godina za ovaj Pravilnik, ukoliko bude uočena potreba za promjenama, OC „Vermont“ će reagovati.



PRAVILNIK ZA DODJELU GRANTOVA U BRČKO DISTRIKTU

Omladinski centar "Vermont" kroz niz poduzetih aktivnosti proteklih mjeseci nastavio borbu za izmjene Pravilnika za dodjelu grantova u Brčko distriktu sa grupom NVO.


Rezultat svega toga je da su dva Odjeljenja Vlade Brčko distrikta BiH (Odjeljenje za stručne i administrativne poslove i Odjeljenje za privredni razvoj, sport i kulturu) objavile Javne pozive za finansiranje i sufinsaniranje na osnovu Pravilnika koji su donijeli u saradnji sa Omladinskim centrom "Vermont" i drugim nevladinim organizacijama.

Na ovaj način ukinuta je linearna dodjela sredstava NVO i od ove godine se dodjela vrši putem Javnog poziva za dostavu prijedloga projekata. Dakle, uveden je klasični konkurenčki javni poziv za dodjelu sredstava bez favorizovanja organizacija. Istovremeno je prvi put uvedena prezentacija javnog poziva u oba odjeljenja sa pojašnjnjem oko popunjavanja aplikacionih obrazaca.

U cilju adekvatnog praćenja realizacije projekata, oformljena je komisija za monitoring i kontrolu utroška sredstava dobijenih putem javnih poziva.

Izmjenom Pravilnika u navedenim odjeljenjima ukinut je prostor dodjeljivanja sredstava kroz amandman od strane političkih partija organizacijama po njihovom izboru. Sada se sve organizacije moraju javljati na Javne pozive. Formirana je komisija od tri člana, plus sekretar komisije, koja će pregledati pristigle aplikacije za sredstva i nakon toga dati svoje stručno mišljenje. Po prvi put su održane edukacije oko popunjavanja aplikacionih obrazaca za Vladine službenike i za nevladine organizacije, mada je cilj kome će OC "Vermont" težiti je da u budućnosti budu zajedničke edukacije za predstavnike Vlade Brčko distrikta BiH i nevladinih organizacija.






PREKINI LANAC KORUPCIJE: PUSTI RIJEKU NEKA TEČE!

Uz podršku Aarhus centra u okviru projekta "Prekini lanac korupcije: pusti rijeku neka teče!" koji se realizuje s ciljem smanjenja korupcije u hidroenergetskom sektoru u Bosni i Hercegovini u proteklom periodu postignuti su značajni rezultati.

SPAS ZA VRBAS Velika pobjeda građana Donjeg Vakufa!

Tokom mjeseca jula, na šestoj redovnoj sjednici Općinskog vijeća Donji Vakuf jednoglasno je odbijeno davanje prethodne saglasnosti za izgradnju male hidroelektrane (mHE) "Krivače 1" i MHE "Krivače 2" na Vrbasu. Ovom odlukom, osamnaset prisutnih vijećnika je podržalo građansku inicijativu u borbi protiv izgradnje ovih objekata. Također, usvojen je i Zaključak da se pitanje građenja hidrocentrala na rijeci Vrbas i njenim pritokama u narednih 20 godina ne stavlja na Dnevni red Općinskog vijeća Donji Vakuf, te je na taj način uvažen apel građana i Aarhus centra u BiH, koji se bore za zaštitu rijeka od koruptivne destrukcije.



JOŠ JEDNA “PREVARA” U REŽIJI MINISTARSTVA PROSTORNOG UREĐENJA SBK: Ovog puta na meti je rijeka Ugar!

Ministarstvo prostornog uređenja, građenja, zaštite okoliša, povratka i stambenih poslova Srednjobosanskog kantona je investitoru V.N.T. d.o.o. Novi Travnik izdalo pravno upitnu građevinsku dozvolu za malu hidroelektranu “Oštrac“ na rijeci Ugar. Naime, investitor već preko godinu dana izvodi radove na gradnji svoje male hidroelektrane na bazi građevinske dozvole iz 2019. godine, kojom se ne ispunjavaju zakonom predviđeni uvjeti. Sigurno je da energetska dozvola ne može vrijediti retroaktivno, odnosno investitor već mjesecima izvodi radove na temelju pravno upitne građevinske dozvole. Iz tog razloga, Klub sportskih ribolovaca iz Travnika u saradnji sa Aarhus centrom u BiH pokrenuo je postupak poništenja nezakonito izdate građevinske dozvole.



Aktivisti iz Travnika PREDALI INICIJATIVU za zaštitu rijeka u SBK

Članovi neformalne grupe NVO “Dižimo glas za naše rijeke” su se angažovali da ukažu Općinskom vijeću Travnika kao i široj javnosti na hitnu potrebu mijenjanja Prostornog plana SBK-a u smislu brisanja novih malih hidrocentrala iz istog. Peticiju je potpisalo 15 travničkih NVO, 2605 građana sa biračkog spiska Općine Travnik, 75 građana sa drugih općina, te 10 Savjeta mjesnih zajednica. Prikupljanjem potpisa građana uz poruku “**BUDI MUDAR SPASI UGAR**”, aktivisti iz Travnika i drugih gradova u SBK su zatražili zakonsku zaštitu rijeke Ugar, Bile, Kozice, Jasenice i Zaseljačka rijeke i svih ostalih rijeka u SBK. Tokom mjeseca septembra incijativu su zvanično i predali Općini Travnik. Svi su odlučno stavili svoj potpis kako bi zaštitili rijeke od dalje devastacije, a naročito Ugra i Bile, na kojima je izgrađeno ili je planirana izgradnja novih mHE.



APLIKACIJA ZA ANONIMNU PRIJAVU ILEGALNIH AKTIVNOSTI U ŠUMARSTVU UZ POMOĆ GRAĐANA

Incijativa za šumarstvo i okoliš FEA izradila je i pustila u primjenu, te promovisala jedinstvenu mobilnu aplikaciju, pod nazivom “Čuvajmo šume”, i prateću bazu podataka, za anonimnu prijavu ilegalnih aktivnosti u šumarstvu.


Građani/ke sarajevskog i zeničko-dobojskog kantona, sada imaju priliku na jednostavan način prijaviti sve ilegalne aktivnosti u šumarstvu putem mobilne aplikacije, a sve prijave se automatski prosljeđuju nadležnim organima.

Mobilna aplikacija preliminarno je predstavljena javnosti na press konferenciji 17.09.2021. godine u Sarajevu. Tom prilikom su prisustvovali i ministar privrede KS, direktor KJP “Sarajevo-šume” doo Sarajevo, te IT ekspert koji je kreirao navedeni softver, koji su pozvali sve građane/ke da putem navedenih alata prijavljuju sve nelegalne aktivnosti u šumarstvu.

Aplikacija je dostupna!



Čuvajmo naše šume zajedno!



DOSTAKORUPCIJE ORG



DOSTA KORUPCIJE!

Udruženje sindikata uposlenika Fonda vodi kampanju za smanjenje korupcije u dodjeli sredstava, kojima raspolaže Javna ustanova Fond za profesionalnu rehabilitaciju i zapošljavanje osoba sa invaliditetom FBiH.

U proteklom periodu sve negativnosti na koje je Sindikat ukazivao vezano za poslovanje Fonda za profesionalnu rehabilitaciju i zapošljavanje osoba sa invaliditetom u oblasti profesionalne rehabilitacije i zapošljavanja osoba sa invaliditetom je dobilo svoju potvrdu kroz:

1. Neusvajanje izvještaja o radu Fonda za profesionalnu rehabilitaciju i zapošljavanje osoba sa invaliditetom za 2020. godinu od strane osnivača tj. Parlamenta FBiH
2. Mišljenje sa rezervom sa preporukama Ureda za reviziju institucija FBiH a vezano za finansijsku reviziju Fonda za profesionalnu rehabilitaciju i zapošljavanje osoba sa invaliditetom za 2020. godinu

Dodatno ukupno za profesionalnu rehabilitaciju i zapošljavanje osoba sa invaliditetom izdvojeno je 5.510.000,00 KM što je direktni rezultat aktivnosti koje je Sindikat poduzeo u proteklom periodu, između ostalog, i aktivnosti Monitoringa, jer ovaj javni poziv prethodno nije bio planiran od strane Fonda za profesionalnu rehabilitaciju i zapošljavanje osoba sa invaliditetom.



Da se ne ponovi maj 2014

Centar za Humanu Politiku (CHP) vodi kampanju kako bi ukazali na koruptivne interese i ponašanja u oblasti zaštite od poplava na području Grada Doboja, institucionalnu neodgovornost lokalnih i entitetskih vlasti, davanje saglasnosti i tolerisanje zakonom zabranjene gradnje i drugih radova uz rijeku Bosnu, kao i nenamjensko raspolaganje sa vodnom naknadom.

Nastavljeno je sa aktivnostima na informisanju građana, uz poruku da neko zastupa njihove interese u oblasti antikoruptivne zaštite od poplava, što je razdrmalo građane i izazvalo mnogobrojne povratne reakcije građana.

Navedeno je rezultiralo i mnogobrojnim prijavama u vezi eksplotacije šljunka iz korita rijeke Bosne, devastaciji korita rijeke Bosne i deponovanju otpada uz rijeku Bosnu, na koje Vode Srpske i Republička vodna inspekcija nisu reagovale na način da pokažu spremnost na promjenu dosadašnje prakse nereagovanja, kao i Tužilaštvo o čijem postupanju još nema informacija. Ovo neće zaustaviti dalju borbu i pritisak ka nadležnim da počnu rješavati ovaj problem.

“Bravo”,

“Svaka vam čast...
ustrajte u vašoj borbi”

I ja sam ovo snimao i kod Rudanke..ne vrijedi..iako je stanje od Grapske prema Osječanima još puno gore..rijeka Bosna sada uopste(uopšte) nema obale..vidjet će građani ako bude 5 dana kiša padala bit će nezapamćena poplava..ali ne samo grad i sva okolna sela pa i Modriča bit će uništena”

TRANSPARENTNOŠĆU PROTIV KORUPCIJE U PRAVOSUĐU



Visoko sudsko i tužilačko vijeće (VSTV) je u septembru 2021. g., nakon šest godina i nakon što je Balkanska Istraživačka Mreža Bosne i Hercegovine (BIRN BiH) analizirala obavezu VSTV-a da učini komunikacijsku strategiju obaveznom, a pravosuđe transparentnijim, donijelo odluku o formiranju radne grupe za izradu Komunikacijske strategije. BIRN BiH se odazvala i na javni poziv VSTV-a te poslala prijedloge i sugestije na Strategiju. BIRN BiH je od VSTV-a dobila potvrdu da će zaprimljeni komentari i sugestije BIRN-a BiH biti uzeti u obzir i uvršteni u okviru same Strategije, a što može značajno unaprijediti transparentnost rada VSTV-a.

BIRN BiH kontinuirano komunicira sa građanima i građankama BiH i poziva da prijave korupciju, uključujući korupciju u pravosuđu BiH. Mnoge takve priče su se istražile i objavile.

Objavljena je reportaža na osnovu pristigle prijave o slučaju Jasmina Habula koji već pet godina čeka okončanje istrage o izbornim nepravilnostima. Habul je još u septembru 2020. godine govorio za TV Justice, emisiju BIRN-a BiH, o izbornim prevarama i dokazima koje je pronašao a koji potvrđuju da je neko mijenjao izborni rezultat 2016. godine. Zbog toga je on kao kandidat izgubio mandat koji su mu povjerili građani svojim glasovima. Reportaža se osvrće i na činjenicu da je domaće pravosuđe rijetko podizalo optužnice za izborne prevare.

Na osnovu priče Asmira Hadžića iz Lukavca koji se obratio timu BIRN BiH, nakon što su ga u jesen 2020. obavijestili iz firme u kojoj radi da su zaprimili sudske naloge za pljenidbu polovine njegovog ličnog dohotka, objavljena je analiza "Sudovi ne štite dovoljno žirante u dugim i skupim postupcima". Ispostavilo se da je to posljedica kreditnog ugovora iz 2005. godine, na kojem, kako tvrdi Hadžić, nije njegov potpis. Analizirani su slučajevi u BiH u kojima su ljudi morali otplaćivati tuđe kredite, često iz razloga jer je njihov potpis krivotvoren. Uz ovu analizu snimljen je i video "Sudovi ne štite dovoljno žirante u dugim i skupim postupcima".

Dvije godine od podnošenja krivične prijave uposlenika protiv tadašnjeg direktora Operatora za obnovljivi izvor energije i efikasnu kogeneraciju (Operator za OIEiEK) zbog nezakonitog postupanja u radu ove institucije, Tužilaštvo Hercegovačko-neretvanskog kantona do danas nije završilo istragu, niti su nepravilnosti otklonjene uprkos upozorenjima Finansijske policije i Evropske komisije, pokazala je analiza BIRN BiH. U martu 2021. podnijeta je i treća krivična prijava zbog nezakonite dodjele dinamičkih kvota – maksimalnog nivoa proizvedene snage koja se može prodati u toku godine.



JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE



KONTINUIRANI JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

Poziv OCD (udruženjima građana i fondacijama) iz BiH da podnesu prijedloge projekata usmjerenih na borbu protiv korupcije, s fokusom na rješavanje konkretnih problema identifikovanih na lokalnom nivou ili zagovaračkih inicijativa usmjerenih ka višim nivoima vlasti.

Od aplikantata se traži da dostave ispunjenu aplikacionu formu, te ostale aplikacijom zahtijevane dokumente i to isključivo putem on-line platforme za apliciranje dostupne na linku:

<http://tender.protivkorupcije.ba/>

Izdvajamo 3 najčitanije vijesti sa portala antikorupcija.info:

»ČIJE DIPLOME SE NE PRZNAJU. A KO ŠTANCA“ DOKTORATE?«

Utvrđena je lista visokoškolskih ustanova iz RS čije diplome se, prema tumačenju Ministarstva civilnih poslova BiH, ne priznaju prilikom konkursiranja za zapošljavanje u javnim ustanovama. A entitetsko Ministarstvo zaprimilo je prijavu nezadovoljnih profesora Saobraćajnog fakulteta u Doboju, o olakom sticanju diploma doktora nauka na toj VŠU.

Nastavak možete pročitati na:
www.antikorupcija.info

VJEĆI U FOKUSU INTERVJU KOMENTARI I ANALIZE REGIJA I SVIJET PODCAST POSJEĆANJA LIČNI STAV GRADANI U AKCIJI PODŠĆA U BORBI

Komentari i analize
ČIJE DIPLOME SE NE PRZNAJU. A KO „ŠTANCA“ DOKTORATE.
© 27.09.2021. & L.D. Antikorupcija Foto: L.D.)



Općinsko vijeće poslušalo sveće građane - NEMA NI GRADNJE NI PLANIRANJA NOVIH MRE U JACU Građanski aktivizam

Ogranična pružanja po stanovništvo i materijalna dobra razvodno od... Građanski aktivizam

Aktivisti za borbu protiv nelegalnog sljunkarenja đakansul u okviru ulične akcije... Građanski aktivizam

Vlast rivali građanske aktiviste, ali bi volela da oni nisu nekratko... Građanski aktivizam

Spladičnica otpada zadrinila, muštanice lopara (VIDEO) Građanski aktivizam

Utrudna je lista visokoškolskih ustanova iz RS čije diplome se, prema tumačenju Ministarstva civilnih poslova BiH, ne priznaju prilikom konkursiranja za zapošljavanje u javnim ustanovama. A entitetsko ministarstvo zaprimilo je prijavu nezadovoljnih profesora Saobraćajnog fakulteta u Doboju, o olakom sticanju diploma doktora nauka na toj VŠU.



»JEL VIŠE VJERUJETE SVOJIM OČIMA ILI NAMA?« - INSTITUCIJE NASMIJAVAJU GRAĐANE I PRIKRIVAJU NEZAKONITE RADNJE ŠLJUNKARA.«

Umjesto šlunkarskim bezakonjem i korupcijom u svojim redovima, u "Vodama Srpske" bave se internim istragama s ciljem otkrivanja ko javnosti dostavlja sporne podatke iz ugovora "Voda" sa šlunkarima? Javna ustanova „Vode Srpske“ dobrano je natjerala Dobojske na smijeh i zbijanje šala nakon njihovog odgovora na prijavu sumnji za nezakonit rad šlunkara u neposrednoj blizini gradskog mosta kod željezničke stanice.

Nastavak možete pročitati na:
www.antikorupcija.info


»PROBLEMI U RAJU (ILI – KAKO POTENCIJALNU TURISTIČKU OAZU PRETVORITI U INDUSTRIJSKU NOĆNU MORU)«

Čovjek u Kreševu ostane nijem ne samo pred nevjerojatnim prirodnim ljepotama nego i pred glupošću i pohlepom koja uništava i te prirodne ljepote i živote ljudi.

Nastavak možete pročitati na:
www.antikorupcija.info

VJEĆI U FOKUSU INTERVJU KOMENTARI I ANALIZE REGIJA I SVIJET PODCAST POSJEĆANJA LIČNI STAV GRADANI U AKCIJI PODŠĆA U BORBI

Komentari i analize
PROBLEMI U RAJU (ILI – KAKO POTENCIJALNU TURISTIČKU OAZU PRETVORITI U INDUSTRIJSKU NOĆNU MORU)
© 23.07.2021. & G.H. i H.N. Antikorupcija



Općinsko vijeće poslušalo sveće građane - NEMA NI GRADNJE NI PLANIRANJA NOVIH MRE U JACU Građanski aktivizam

Ogranična pružanja po stanovništvo i materijalna dobra razvodno od... Građanski aktivizam

Aktivisti za borbu protiv nelegalnog sljunkarenja đakansul u okviru ulične akcije... Građanski aktivizam

Vlast rivali građanske aktiviste, ali bi volela da oni nisu nekratko... Građanski aktivizam

Spladičnica otpada zadrinila, muštanice lopara (VIDEO) Građanski aktivizam

Čovjek u Kreševu ostane nijem ne samo pred nevjerojatnim prirodnim ljepotama nego i pred glupošću i pohlepom koja uništava i te prirodne ljepote i živote ljudi.



STOPIRANA NETRANSPARENTNA POTROŠNJA

Nakon zaključenih 3.388 direktnih sporazuma vrijednih preko 2 miliona KM, portal Pratimo tendere u julu 2021. godine zaustavio je kršenje Zakona o javnim nabavkama i netransparentnu potrošnju Instituta za javno zdravstvo Republike Srpske. Naime, umjesto opšte oznake KUF (knjiga ulaznih faktura) kojom je čak punih šest godina skrивao informacije na šta je potrošen novac građana, nakon intervencije portala Pratimo tendere Institut je počeo da objavljuje stvarne nazive roba i usluga koje kupuje. Skrivanje predmeta javne nabavke problematično je sa više aspekata. Građanima je uskraćena informacija na šta se troši njihov novac, a ponuđačima je uskraćena mogućnost učešća u postupku nabavke i posljedično pravo na žalbu na postupak javne nabavke. Istovremeno, zaključivanjem direktnih sporazuma uz skrivanje predmeta nabavke izbjegava se primjena transparentnog otvorenog postupka, čime se pogoduje određenim ponuđačima, a krajnja cijena roba i usluga po pravilu bude skuplja. Skrivanje predmeta nabavke ne samo da predstavlja netransparentnu i diskriminacionu praksu, nego i kršenje Člana 75. Zakona o javnim nabavkama BiH i podzakonskih akata. Kontinuiranim monitoringom, dokumentovanjem i ukazivanjem na manjkavosti, portal Pratimo tendere je stopirao kršenje zakona i netransparentno provođenje javnih nabavki

VOLONTERI MONITORING MREŽE
JAVNIH NABAVKI



PRATIMO
TENDERE
www.pratimotendere.ba

"Kroz rad na monitoringu javnih nabavki stečla sam znanja o tome kako i na koji način se troši novac građana. Zahvalna sam na prilici da se uključim u ovaj projekt i dana svoj doprinos u borbi protiv korupcije. Zahvaljujući mentoru podršci na ovom projektu, proširila sam svoja znanja rađajući na inovativnom portalu [pratimotendere.ba](http://www.pratimotendere.ba)."

Berina Peitalić (27), Sarajevo

VOLONTERI MONITORING MREŽE
JAVNIH NABAVKI



PRATIMO
TENDERE
www.pratimotendere.ba

"Radionica mi je pomogla da stekнем nova iskustva i vještine koje su se pokazale veroma korisnim za shvaćanje kompleksnijih procesa javne nabavke. Zahvalan sam na prilici da se uključim jer mi je ovo pružilo nova znanja i olaharilo da stekнем što više znanja iz različitih oblasti."

Edis Žulai (22), Jajce

VOLONTERI MONITORING MREŽE
JAVNIH NABAVKI



PRATIMO
TENDERE
www.pratimotendere.ba

"Drago mi je da sam imala priliku okušati se u nečemu dosada nepoznatom pod mentorstvom sjajnih predavača. Ovakvim edukacijama mladi se upoznaju sa značenjem javnih nabavki i njihovim sve češćim mohverzacija. Motivirana sam educirati se i dalje u ovom smjeru i obogatiti svoje znanje i vještine. Stečeno znanje cu iskoristiti u svojem profesionalnom djelovanju."

Kristina Gadić (26), Ljubuški

Link:

<https://www.pratimotendere.ba/bs-Latn-BA/articles/2181/nakon-3-388-direktnih-sporazuma-i-dva-miliona-maraka-pratimotendere-zaustavio-netransparentno-trosenje-budzetskog-novca>

VOLONTERI MONITORING MREŽE
JAVNIH NABAVKI



PRATIMO
TENDERE
www.pratimotendere.ba

"Zahvalna sam na prilici što sam kao volonter pružila doprinos u borbi protiv korupcije koja narušava povjerenje u javne institucije. Čast mi je što je upravo rad za ovaj projekt bio moje prvo radno iskustvo."

Adna Česko (21), Sarajevo

VOLONTERI MONITORING MREŽE
JAVNIH NABAVKI



PRATIMO
TENDERE
www.pratimotendere.ba

"Bilo je zadovoljstvo učestvovati u ovom projektu, dati svoj doprinos u borbi protiv korupcije i naučiti nove stvari o monitoringu javnih nabavki, a sve to uz profesionalan tim predavača i sjajne kolege."

Azelma Halvadžić (25), Tešanj

ZAUSTAVLJENO NETRANSPARENTNO PLANIRANJE JAVNIH NABAVKI

Nakon što je portal Pratimo tendere u avgustu 2021. monitoringom otkrio i objavio da je nabavka „Roba štampanog materijala“ koju je proveo „Mostar bus“ rizična i dodijelio joj »žutu zastavicu« zbog nedostupnosti Plana nabavki za 2021. godinu, ovo javno preduzeće je ekspresno reagovalo i otklonilo uočeni nedostatak. Naime, kroz rad na prikupljanju i analizi podataka o javnim nabavkama preduzeća „Mostar bus“ uočeno je da na svojoj internet stranici nisu objavili Plan nabavki iako prema Zakonu o javnim nabavkama BiH ugovorni organ mora objaviti plan nabavki na svojoj internet stranici najkasnije u roku od 60 dana od dana usvajanja budžeta, odnosno finansijskog plana.

Više na FB stranici i portalu **pratimotendere.ba**

Zakon je predvidio i prekršajnu sankciju za ugovorne organe i odgovorne osobe u ugovornim organima ukoliko ne donesu Plan nabavki i ne učine ga dostupnim na svojoj internet stranici. Iznos kazne za ugovorne organe je od 1.500 do 15.000 KM, a za odgovorne osobe u ugovornim organima od 300 do 3.000 KM. Nakon što je portal Pratimo tendere otkrio kršenje zakona, preduzeće „Mostar bus“ je objavilo Plan nabavki za 2021. godinu

Link:

<https://pratimotendere.ba/bs-Latn-BA/articles/2220/nakon-objave-portala-pratimo-tendere-mostar-bus-ucinio-dostupnim-plan-nabavki-za-2021-godinu>

PRATIMOTENDERE.BA



PRATIMO TENDERE

ANTIKORUPTIVNE AKTIVNOSTI TRANSPARENCY INTERNATIONAL BIH



Ombudsman za ljudska prava BIH upozorio je da Uprava za indirektno oporezivanje BIH nije dokazala da bi njen zaposlenik Emir Mešić bio izložen disciplinskom progonu i da nije prijavio korupciju i naložio Agenciji za prevenciju korupcije i koordinaciju borbe protiv korupcije (APIK) da reaguje. Odluka Ombudsmana uslijedila je nakon žalbe koju je podnio Transparency International u BIH (TI BiH) jer APIK odbija da interveniše u ovom slučaju i zaštiti Mešića koji ima status „zaštićenog prijavioca korupcije“.

TI BiH je 29. maja 2020. godine podnio krivičnu prijavu Okružnom javnom tužilaštvu Banja Luka protiv rukovodstva Instituta za javno zdravstvo RS zbog spornih nabavki medicinske opreme od nekvalifikovanih ponuđača. Institut je tokom aprila prošle godine nabavljao medicinske zaštitne maske od firme Procontrol iz Banjaluke koja se bavi arhitektonskom i inžinjerskom djelatnošću, kao i medicinsku zaštitnu opremu od turističke agencije Travel4Fun. Nijedna kompanija nemaju dozvolu za promet medicinskim sredstvima, iako se takav uslov tražio tenderskom dokumentacijom koju je Institut dostavio TI BiH. TI BiH je dobio službenu potvrdu Agencije za lijekove da Travel4fun nema dozvolu za trgovinu medicinskim proizvodima. Institut je naknadno objavio da je Travel4Fun dio grupe ponuđača zajedno sa "Promeding" d.o.o. iz Laktaša, koji ima licencu Agencije, ali se to ne spominje u obavijesti Zavoda na portalu javnih nabavki. TI BiH je to problematizirao u krivičnoj prijavi jer postoji osnovana sumnja da je ovo preduzeće kasnije dodano kako bi se pokušala opravdati nezakonita dodjela ugovora. Okružni sud u Banjoj Luci odredio je jednomjesečni pritvor za Branislava Zeljkovića, direktora Zavoda za javno zdravstvo RS, i druge osumnjičene za zloupotrebu službenog položaja u nabavci medicinske opreme na početku pandemije koronavirusa u Republici Srpskoj. Osim Zeljkovića, privedeni su i Dragan Dubravac, direktor kompanije "Promeding", Slavko Bojić, direktor "Procontrol -a" i Saša Marković, vlasnik turističke agencije "Travel for fan".



U septembru 2021. TI BIH zatražio je od Agencije za lijekove i medicinska sredstva Bosne i Hercegovine, kao i od zdravstvenih tijela u oba entiteta, da ispitaju aktivnosti pet izvođača koji su na neovlašten način opskrbljivali javne zdravstvene ustanove kisikom. TI BIH je dobio službenu potvrdu Agencije za lijekove da pet od ukupno šest kompanija, koje su u proteklom periodu putem javnih nabavki sklopile ugovore s javnim zdravstvenim ustanovama, nemaju odobrenje za stavljanje lijeka u promet.

TI BIH je na ovaj problem ukazao još u junu ove godine kada smo zatražili od Agencije da započne inspekciju preduzeća koje je snabdjelo bolnicu u Trebinju a koje nije bilo u javnom registru. Važno je napomenuti da je TI BiH dobio službeni dopis Agencije, koji se prethodno pojavio u medijima, da je inspekcijom utvrđeno da se tehnički plin koristi u medicinske svrhe, što ugrožava zdravlje pacijenata.

8+ obuka sa poslodavcima i zaposlenima

Organizirano je sedam jednodnevnih obuka za predstavnike poslovnog sektora u Republici Srpskoj o primjeni Zakona o zaštiti osoba koje prijavljuju korupciju u Republici Srpskoj. Obuke su održane u sljedećim gradovima: Banja Luka (08.09.2021), Prijedor (09.09.2021), Doboj (13.09.2021), Bijeljina (14.09.2021), Istočno Sarajevo (15.09.2021), Foča (16.09.2021) i Trebinje (17.09.2021). Nije bilo dovoljno zainteresiranih kandidata za pohađanje obuka u Novom Gradu, pa je odlučeno da se obuka odloži za sljedeću projektnu godinu. Obukama je prisustvovalo 65 učesnika, koji su na osnovu evaluacijskih formi, obuku ocijenili izuzetno korisnom.



TRANSPARENCY INTERNATIONAL U BIH
CENTAR ZA PRUŽANJE
PRAVNE POMOĆI

PRIJAVI
KORUPCIJU

POTRAŽI PRAVNU POMOĆ

0800 55 555

WWW.PRIJAVIKORUPCIJU.ORG
WWW.TI-BIH.ORG





CENTRI CIVILNIH INICIJATIVA
ЦЕНТРИ ЦИВИЛНИХ ИНИЦИЈАТИВА



CENTAR ZA RAZVOJ MEDIJA I ANALIZE



Podržano:



USAID
OD AMERIČKOG NARODA

Ova publikacija omogućena je uz podršku američkog naroda putem Američke agencije za međunarodni razvoj (USAID).

Sadržaj ove publikacije je isključiva odgovornost Centra civilnih inicijativa(CCI) i ne mora nužno odražavati stavove USAID-a ili Vlade Sjedinjenih Američkih Država.